

## Was merr so babbelt

Honnes, wonn kimmsden hoom?  
Ich bin doch noch garnitt fort.  
Awwer du willst doch fort?  
Ja, awwer jetz noch nitt.  
Uff was wartsde donn?  
Uff de Schorsch, der hollt mich ab.  
Wo woldern hie?  
Ich waaß ess nitt.  
Dess mussde doch wisse.  
Naa, dess waaß de Schorsch.  
Hotter nix gesaat?  
Doch.  
Unn was?  
Dass merr mol fortwolle.  
Ja wohie donn?  
Dess werrder merr saache.  
Hosde Geld oisticke?  
Naa.  
Dann steck derr was oi.  
Ja, gebb merr was.  
Wievill brauchsde?  
Gebb merr mol zeh Euro.  
Doo konnsde nitt weit hibbe.  
Mir wolle nitt hibbe.  
Was wolder dann?  
Ooner drinke.  
Saach emol, was issen los?  
Was sollen los soi?  
Weilde nitt säts wo err hiewollt.  
Weil ichs nitt waaß.  
Ihr werrd doch nitt ...  
Was werrn merr nitt?  
No ja.  
No ja! Also mett zeh Euro!  
Villeicht hosde was dubbess gemacht?  
Wie soll ich dann was dubbess mache?  
Wennde oikaafe giehst.  
Mir dun immer abrechene, odder?  
Nitt immer.  
Awwer meisdens.  
Hier, zeh Euro.  
Donke schee.  
Ewe hotts gehubt.  
De Schorsch iss doo. Bis später.

Joo, bis später. Hosden Schlissel?  
Ja, habb ich.

Gude Schorsch.  
Gude Honnes.  
Wo mache merrn hie?  
De erst in die Kolonnade.  
Bier holle?  
Ja. Wer issen droo?  
Ei ich. Hier, zeh Euro.  
Dess longt ferr enn Kasde.  
Unn donn?  
Fahrn merr bei mich hoom.  
Enn Film gucke?  
Ja, ich habben gonz dolle.  
Dess iss gut. Werrd aach geknallt?  
Im Stehe, im Sitze unn im Liesche.  
Sehr gut. Awwer doi Fraa?  
Die iss nitt dehoom.  
Sunnst kennte merr joo nitt gucke.  
Die derrf nix wisse von so emm Film.  
Moi aach nitt, weesche de Knallerei.  
Awwer mir kenne heit endlich widder ...  
... ohne dass gemeckert werred  
... uns enn ahle Western  
... mettem John Wayne oogucke.

Eiern Honnes